



**Naalackersuisut Atuarfik pillugu Inatsisartut inatsississaat nr. 15, 3.
December 2012-imeersup kingornalu inatsimmut
ilanngunneqarsimasinnaasunut atatillugu atuuttumut nalunaarummut
Meeqqat atuarfianni immikkut ittumik atuartitsisarneq aammalu allamik
immikkut perorsaanikkut ikiorsisarneq pillugu Namminersornerullutik
Oqartussat nalunaarutaat nr. 22, 23. juli 1998-imeersumut
tulluussaaqqinneqarnissamik peqquneqarnissaannik Inatsisartut
aalajangiiffissaattut siunnersuut**

(Inatsisartuni ilaasortaq Debora Kleist, Inuit Ataqatigiit)

Inuit Ataqatigiit Debora Kleist qutsavigaarput eqqummaarilluni meeqqat atuarfianni immikkut atuartitsinermi Nalunaarusiat ataqatigiinnginneri Naalackersuisunut suliassiissutigimmagit. Isumaqarpugut suut nalunaarutit allanngorsimagaangata pingaarluinnartooq nalunaarusiat ataqatigiissarneqarnissaat.

Uani ajornartorsiutitut qitiusoq tassaavoq 2012-imi meeqqat atuarfiat pillugu Inatsisartut inatsisaat nutaaq saqqummermat, immikkut atuartitsinerup aamma annertusisamik immikkut atuartitsinerup (VSP) akornanni immikkoortinneqannginnera. Nalunngilarpulli suli meeraqartoq suli immikkut annertusisamik ikiorneqarlutik atuartinneqarnissaminnik pisariaqartitsisunik.

Meeqqat atuarfianni immikkut ittumik atuartitsisarneq aammalu ikiorsisarneq pillugu Namminersornerullutik Oqartussat nalunaarutaat nr. 22, 23. juli 1998-imeersoq aallaavigalugu suli ingerlanneqarpoq.

Inuit Ataqatigiit ajuusaarnartutut isigivarput Nalunaarusiaq 2015-mi nalilersuinermut tunngatillugu nutaamik taarteqartinneqassasoq ilisimasaarutigineqarsimagaluarnera sulilu piviusunngortinneqarsimanani, naak nalunaarusiassaq pillugu arlaleriarluni tusarniaasoqartarsimagaluartoq.

IMAK-imi paasiniaaffigigatsigu nalunaarpoq Nalunaarusiamik tusarniaasoqarmat IMAK-iminngaanniit 2014-mi tusarniaanermut akisoqarnikuusoq, taamanikkulligooq nalunaarusiaq eqqaaneqartoq qanoq isikkulerluni ingerlanniarneqarnersoq IMAK-iminngaanniit takuneqarsimanngilaq.

IMAK-imiit aamma eqqaaneqarpoq 2002-mili sananeqareersussaagaluartoq, taamanimiillu ukiut maanna 15-it qaangiussimalersut.

INUIT ATAQATIGIIT

Inatsisartuni



Naalakkersuisut siunnersuuteqartoq isumaqatigaat nalunaarummik nutarterisoqarnissaa pillugu pisariaqartitsisoqarmat. Naalakkersuisullu tamatumunnga atatillugu ilisimatitsissutigivaat maanna immikkut ittumik atuartitsisarneq pillugu nalunaarutissamut siunnersuummik nutaamik suliaqartoqareersimammat. Siunnersuut kommuninit, PPR-imit imaluunniit MISI-mit sinniisut qanimut oqaloqatigisarlugit suliaavoq, susassaqartunullugooq tusarniaassutigineqareerluni.

Naalakkersuisut akissuteqaatiminni ilisimatitsissutigivaat atuarfinnut ilitsersuummut missingersuusiamik suliaqartoqarsimammat, iluarsisassallu kingulliit maanna suliarineqarmata. Taamaattumillu Naalakkersuisut naatsorsuutigaat nalunaarut piffissami qanittumi akuersissutigineqassasoq.

Inuit Ataqatigiit immikkut atuartitsinermit nalunaarutit pingaartutut isigaagut. Pingaartuuvorlu kommunini, immikkullu atuartitsinermi siunnersuiffinni PPR/ MISI-luunniit toqqissumik sulinissamut nalunaarutit pingaaruteqarnerat.

Naalakkersuisut suliaat qanimut malinnaaffigiumallugu, aammalu nalunaarusiap ingerlanneqarnera malinnaaffigiumallugu Debora Kleistip siunnersuutaa ataatsimiitsitaliamut susassaqartumut ingerlateqqikkumavarput.